



Y CHWECHED DOSBARTH  
THE SIXTH FORM

## CYNNWYS

<b>Gair gan y Pennaeth</b>	3
<b>Croeso i Addysg ôl-16</b>	3
<b>Personél sy'n ymwneud ag Addysg ôl-16</b>	4
<b>Gair gan y Prif Ddisgyblion</b>	5
<b>Cwricwlwm ôl-16</b>	6
Cyflwyniad	
Amser addysgu ac amser dysgu	
Strwythur y Cysiau	
Faint o bynciau y ddylech eu hastudio ym Mlwyddyn 12?	
Tystysgrif Her Sgiliau Uwch (Bagloriaeth Cymru)	
Pynciau Lefel Uwch ac Uwch Gyfrannol a gynigir ar y cyd	
Addysg a Chyfarwyddyd Gyrfaoedd	
Pwyntiau UCAS	
<b>Cyfoethogi</b>	11
Amrywiol Gyfleoedd	
Profiad Gwaith	
Gwaith Gwirfoddol / Magu Profiad Perthnasol	
<b>Adnoddau</b>	12
Canolfan y 6ed a'r Harbwr	
Technoleg Gwybodaeth a Chyfathrebu	
<b>Lles</b>	13
Lwfans Cynhaliaeth Addysg	
<b>Rheolau</b>	13
Breintiau	
Gwisg Ysgol	
<b>Y Dyfodol</b>	14
Gwybodaeth a Chyngor ynglŷn â Mynediad i Addysg Uwch	
<b>Y Cam Nesaf</b>	14



## GAIR GAN Y PENNAETH

Mae'r prospectws hwn yn amlinellu'r ddarpariaeth eang a gynigir yn y Chweched Dosbarth yn Ysgol David Hughes. Rydym yn hynod falch o'n myfyrwyr Chweched Dosbarth a'u llwyddiannau cyson yn academiaidd yn ogystal â'u datblygiad personal.

Mae addysgu o'r safon uchaf ynghyd â'r pwyslais ar ddysgu effeithiol wedi sicrhau canlyniadau rhagorol mewn arholiadau Safon Uwch ac UG. O gyfuno hynny gyda gofal, arweiniad a chefnogaeth arbennig, mae myfyrwyr yn gweithio'n galed, yn mwynhau eu dysgu ac yn cael eu derbyn ar gyrsiau prifysgol a gyrfaoedd o'u dewis.

Mae myfyrwyr Ysgol David Hughes yn gweithio yn arbennig o dda gyda charfan o athrawon ymroddedig sydd â phrofiad ac arbenigedd eang wedi ei feithrin dros nifer o flynyddoedd mewn ystod o bynciau. Rydym yn cynnig cwricwlwm eang ac amrywiol yn cynnwys cyrsiau Safon Uwch yn ogystal â rhai galwedigaethol, rhai mewn cydweithrediad gyda phartneriaid lleol.

Mae gennym adnoddau rhagorol ar draws yr ysgol yn ogystal ag yn y Ganolfan Chweched, ac mae hyn yn creu amgylchedd ddysgu gadarnhaol a chefnogol lle mae'r myfyrwyr yn ffynnu.

Rydym yn dymuno i'n myfyrwyr fod yn falch o fod yn rhan o gymuned Ysgol David Hughes a'u bod yn teimlo'n ddiogel a'u bod yn perthyn. Dymunwn hefyd eu cefnogi i fod yn ddysgwyr annibynnol ac iddynt ddeall fod unrhyw beth yn bosib o ymrwymo i waith caled ac ymdrech gyson.

Drwy ymuno â'r Chweched Dosbarth yn Ysgol David Hughes byddwn yn eich cyfeirio ar lwybr tuag at ddyfodol llwyddiannus a chyffrous.

## CROESO I ADDYSG ÔL-16

Pwrpas Addysg ôl-16 yw eich paratoi chi, fel unigolyn, ar gyfer dyfodol sydd â phwrpas iddo. Gobeithiwn eich gweld yn aeddfedu yn academiaidd, yn bersonol ac yn gymdeithasol yn ystod eich cyfnod ym Mlynnyddoedd 12 + 13.

Wrth gwrs, fe fydd amrywiaeth eang yn eich galluoedd cynhenid, eich cymwysterau, eich anghenion a'ch diddordebau ond ceisiwn ar bob achlysur ystyried beth sydd orau i chi fel unigolyn o fewn eich cwrs astudiaeth. Mae'n bwysig eich bod chi eich hunan yn gwneud yr un peth.

Mae eich cymhelliant chi yn awr yn gwbl hanfodol i'ch llwyddiant i'r dyfodol. Pa bynciau ydych chi'n eu mwynhau? Oes gennych nod arbennig? Pa mor benderfynol ydych chi o gyrraedd eich nod? Ydych chi'n fodlon aberthu i'w gyrraedd? Neu ydych chi'n cael eich chwythu gan bob gwynt, yn newid cyfeiriad yn aml, yn ansicr eich meddwl? Ydych chi'n dychwelyd i'r ysgol yn hollol ddiarmacan neu am fod pwysau allanol arnoch i wneud hynny? Ystyriwch o ddifrif yn awr. Peidiwch â dewis cwrs am fod gennych ffrind yn ei ddilyn. Ystyriwch yn ofalus beth sydd orau i chi. Ar hyn o bryd 'rydych yn sefyll ar drothwy'r dyfodol a bydd eich penderfyniad heddiw yn dylanwadu'n gryf iawn ar eich gyrfa yfory.

Gobeithiwn y bydd yr wybodaeth a gewch o ddarllen y llyfryn hwn yn gymorth i chi gychwyn ar daith bwrpasol a llwyddiannus i'r dyfodol.



**PERSONÉL SY'N YMWNEUD AG ADDYSG ÔL 16**  
**PERSONNEL INVOLVED WITH 16+ EDUCATION**

---

**Pennaeth Blwyddyn 12 a 13 / Head of Years 12 and 13**

Mrs Manon Davies

---

**Dirprwy Benaethiaid Blwyddyn 12 a 13 / Deputy Heads of Years 12 and 13**

Mrs Sarah Parry

Mrs Lowri Parry

---

**Pennaeth Cynorthwyol â chyfrifoldeb penodol am Flwyddyn 12 a 13**  
**Assistant Headteacher with specific responsibility for Years 12 and 13**

Mrs Meinir Davies

---

**Gyrfaoedd / Careers**

Miss Lucy Bracegirdle

---

**Tiwtoriaid / Tutors**

Mrs Helen Bebb

Mrs Helen Hale

Mr Daron Harris

Mrs E Angharad Harris

Miss Sally A Hughes

Mrs Mez Saywood-Peyrassé

Mr Andrew Sharrock

Mrs Christina Thatcher

Mrs Mari Rhun Thomas

Mrs Nia Williams

---

**Anogwr Dysgu / Learning Coach**

Mrs Arianwen Owen

---



## GAIR GAN Y PRIF DDISGYBLION

Ers dod yn aelod o Chweched dosbarth Ysgol David Hughes rydw i wedi cael manteisio ar lu o gyfleoedd a phrofiadau amrywiol a chyfoethog. O siarad yn y Senedd yng Nghaerdydd i lunio celf stryd tra ar daith ym Merlin, ac o fyfyrio yn y sesiynau meddwlgarwch i ddawnsio salsa yn ystod Diwrnod Sgiliau, rydw i wedi meithrin llawer o sgiliau gwethfawr. Yn academiaidd, mae pwyslais ar gyrraedd potensial ac awydd cryf gan yr athrawon pynciol i weld eu disgyblion yn llwyddo. Mae cefnogaeth fugeiliol ofalgar i'w chael yng Nghanolfan y Chweched ynghyd ag anogaeth gref i ddod yn ddinasyddion annibynnol wedi i ni adael yr ysgol.

Mae'r holl staff a disgyblion y Chweched Dosbarth a thu hwnt yn hynod groesawgar ac mae'r awyrgylch yn creu cyfle gwych i unrhyw ddisgybl i gyrraedd eu potensial yn ein Chweched dosbarth.

Mae adnoddau Canolfan y 6ed yn wych, gyda dwy ystafell gyfrifiadurol, ystafell dawel a'r Harbwr i weithio ynddynt, sydd yn galluogi ni i gyrraedd ein potensial. Hefyd, mae yna deimlad o gymuned a theulu yn Chweched Ysgol David Hughes.

O wirfoddoli a rhoi cymorth i flwyddyn 7 yn ystod amser cofrestru, i fod yn aelod o'r Cyngor Ysgol a'r Llywodraethwyr, nid yw'n bosib i mi fynegi cymaint rwyf wedi mwynhau fy amser yn y Chweched. Mae'r ymdeimlad o gymuned sydd o fewn teulu'r Chweched dosbarth yn arbennig, a heb os, mae fy amser i yma wedi bod yn uchafbwynt o fy nghyfod yn Ysgol David Hughes.



### CYFLWYNIAD

Mae cwricwlwm a chymwysterau Safon Uwch, Uwch Gyfrannol a Chyrsiau Cymhwysol Safon Uwch ynghyd â'r Dystysgrif Her Sgiliau (BAC) wedi eu cynllunio'n ofalus er mwyn i fyfyrwyr fedru astudio amrywiaeth eang o bynciau ar draws rhaglen dwy flynedd ac i ddatblygu sgiliau gwerthfawr ar gyfer addysg uwch a chyflogaeth.

Mae'r cymhwyster Uwch Gyfrannol yn darparu cwrs sydd wedi ei anelu at y safon y bydd myfyrwyr fel rheol yn ei chyrraedd ar ôl astudio am flwyddyn yn y Chweched ddosbarth. Mae wedi ei gynllunio i gynnig gwell dilyniant ar ôl TGAU ac i annog myfyrwyr i ddewis ystod ehangach o bynciau.

### AMSER ADDYSGU AC AMSER DYSGU

Amser addysgu yw'r amser lle y byddwch mewn gwersi, hynny yw, mewn cysylltiad uniongyrchol â'ch athro/athrawes. Amser dysgu, ar y llaw arall, yw'r amser pryd y disgwylir i chi fod yn gweithio ac yn astudio ar eich pen eich hun. Fe fydd eich athrawon yn gosod amrywiaeth o asesiadau, traethodau a thasgau i chi i'w gwneud. Fe ddylech dreulio rhan helaeth o'ch amser digyswllt yn gweithio yn yr Harbwr, yn yr ystafell dawel neu ar y cyfrifiaduron. Mae'n hollbwysig eich bod yn meithrin a datblygu agwedd aeddfed a chyfrifol tuag at eich gwaith. Eich cyfrifoldeb chi yw rheoli eich amser a sicrhau eich bod yn cwblhau eich gwaith ar amser.

### STRWYTHUR Y CYRSIAU

#### Cyrsiau Uwch Gyfrannol Ac Uwch

Mae cyrsiau Safon Uwch wedi eu rhannu i unedau. Mae'r unedau cyntaf yn rhoi cymhwyster Uwch Gyfrannol (UG). Gelwir yr unedau arall yn U2. Bydd unedau UG ac unedau U2 yn rhoi Safon Uwch llawn.

Fel arfer astudir yr unedau UG ym Mlwyddyn 12 a'r unedau U2 ym Mlwyddyn 13. Bydd asesiad yr unedau UG ychydig yn haws ac yn cynnwys cwestiynau strwythuredig a chwestiynau yn gofyn am atebion byr. Ar y llaw arall fe fydd asesiad yr unedau U2, sef ail hanner y cwrs Safon Uwch llawn, yn fwy anodd ac yn cynnwys cwestiynau sy'n gofyn am atebion estynedig a chwestiynau synoptig yn asesu gwybodaeth a dealltwriaeth ehangach ar draws y cwrs cyfan.

Gellir sefyll arholiadau diwedd uned ym mis Mehefin ym Mlynnyddoedd 12 a 13. Nid yw'n bosib astudio unedau U2 heb astudio a phasio unedau UG yn ogystal.

Mae'n ofynnol bod pob myfyriwr yn pasio eu harholiadau Uwch Gyfrannol er mwyn dychwelyd i Flwyddyn 13.

#### Cyrsiau BTEC Lefel 3

Cynigir sawl pwnc BTEC Lefel 3 Diploma Atodol ar y cyd gydag ysgolion eraill Ynys Môn a Choleg Menai. Mae cwrs BTEC Lefel 3 Diploma Atodol yn cyfateb i un Lefel A. Bydd astudiaeth am un flwyddyn yn unig yn rhoi mynediad i Dystysgrif BTEC Lefel 3 sydd yn cyfateb i un pwnc uwch gyfrannol. Asesir y cyrsiau drwy bortffolio o waith cwrs, ni fydd arholiad. Mae gradd Anrhydedd mewn cwrs BTEC Lefel 3 Diploma Atodol yn rhoi **48** o bwyntiau UCAS.



## FAINT O BYNCIAU A DDYLECH EU HASTUDIO YM MLWYDDYN 12?

Fe fydd nifer y pynciau y mae pob myfyriwr yn eu hastudio ym Mlwyddyn 12 yn dibynnu ar nifer o ffactorau, ee canlyniadau TGAU, y cyfuniad gorau ar gyfer yr yrfa sydd gennych mewn golwg.

Bydd mynediad i'r 6ed dosbarth yn ddibynnol ar arlwy addas ar gyfer y disgybl hynny.

Gellir dewis y pynciau o'r tabl colofnau dewis - **dewiswch un pwnc yn unig mewn colofn**. Ni ellir caniatáu cyfuniad o bynciau y tu fewn i'r un golofn.

Cofiwch fod posib cyfuno pynciau Safon Uwch â phynciau Cymhwysol.

Wrth ddewis eich pynciau ystyriwch y materion canlynol yn ofalus:-

- Cyngor eich athrawon pwnc.
- Y cyfuniad gorau ar gyfer yr yrfa sydd gennych mewn golwg. Gofynnwch am gyngor. Mae croeso i chwi sgwrsio â'ch tiwtor personol, athrawon gyrfaoedd neu Bennaeth Blwyddyn 12/13 ynglŷn â hyn.
- Y pynciau y cawsoch y canlyniadau gorau ynddynt yn arholiadau TGAU.
- Y pynciau yr ydych yn eu mwynhau fwyaf.



Ar ddiwedd Blwyddyn 12, neu ddechrau Blwyddyn 13, bydd rhaid i chwi benderfynu pa bynciau y bwriedwch barhau i'w hastudio. Bydd y mwyafrif yn astudio'r hyn sy'n cyfateb i dri phwnc U2 ym Mlwyddyn 13.

Mae pob disgybl yn dilyn cwrs Tystysgrif Her Sgiliau Uwch (Bagloriaeth Cymru).

Ceir llawer iawn o gyngor a gwybodaeth bellach ar y gwefannau canlynol:

<https://gyrfacymru.llyw.cymru/cyrsiau-a-hyfforddiant/sut-i-ddewis-y-pwnc-neu-gwrs-cywir>

<https://www.thecompleteuniversityguide.co.uk/a-levels-and-highers/choosing-a-levels>

<https://www.theuniguide.co.uk/advice/a-level-choices>

<https://www.informedchoices.ac.uk/>



## TYSTYSGRIF HER SGILIAU UWCH (BAGLORIAETH CYMRU)

Mae Bagloriaeth Cymru yn seiliedig ar Dystysgrif Her Sgiliau ynghyd â Chymwysterau Ategol. Rhaid bodloni gofynion y Dystysgrif Her Sgiliau a'r Cymwysterau Ategol er mwyn cyflawni Bagloriaeth Cymru yn ei chyfanrwydd. Prif nod y cymhwyster yw galluogi'r dysgwyr i ddatblygu ac arddangos dealltwriaeth a hyfedredd mewn sgiliau hanfodol a chyflogadwyedd; caiff y myfyrwyr brofiadau sydd yn eu paratoi'n well ar gyfer Addysg Uwch a chyflogaeth.

Byddant yn cael cyfle i :-

- Weithio gyda chyflogwyr
- Datblygu sgiliau entrepreneuriaidd
- Cymryd rhan mewn gweithgareddau cymunedol
- Gweithio'n annibynnol
- Meithrin hyder personol
- Cryfhau eu sgiliau Llythrennedd, Rhifedd a Llythrennedd Digidol



Disgwylir i'r myfyrwyr feithrin saith sgil hanfodol sydd mor bwysig ar gyfer dysgu, gwaith a bywyd, sef:-

- Llythrennedd
- Rhifedd
- Llythrennedd Digidol
- Meddwl yn feirniadol a Datrys Problemau
- Cynllunio a Threfnu
- Creadigedd ac Arloesi
- Effeithiolrwydd Personol



Mae'r pwyslais ar ddysgu cymhwysol a phwrpasol ac i ddarparu cyfleoedd asesu ar draws sawl cyd-destun, trwy gyfrwng tair Her a Phrosiect Unigol. Caiff bob myfyriwr gefnogaeth gan diwtor personol a mynediad i ystafell adnoddau er mwyn cwblhau eu gwaith. Mae hwn yn bwnc gorfodol.





## PYNCIAU LEFEL UWCH AC UWCH GYFRANNOL A GYNIGIR AR Y CYD GYDAG YSGOLION ERAILL YNYS MÔN A CHOLEG MENAI

Bydd y ddarpariaeth ar gyfer Safon Uwch, UG a BTEC mewn rhai pynciau ar y cyd gydag ysgolion eraill Ynys Môn a Choleg Menai.

Cymhwyster	Pwnc	Lleoliad
UG/A	Almaeneg	Ysgol David Hughes
UG/A	Ffrangeg	Ysgol David Hughes
UG/A	Drama	Ysgol David Hughes
UG/A	Daearyddiaeth	Ysgol David Hughes
UG/A	Cerdd	Ysgol David Hughes
UG/A	Iechyd a Gofal Cymdeithasol	Ysgol David Hughes
UG/A	Y Gyfraith	Ysgol David Hughes
UG/A	Mathemateg Bellach	Ysgol David Hughes
BTEC Lefel 3	Twristiaeth	Ysgol David Hughes
UG/A	Cyfrifiadureg	Ysgol Gyfun Llangefni
BTEC Lefel 3	Cyfryngau Creadigol – Teledu a Ffilm	Coleg Menai, Llangefni
BTEC Lefel 3	Cyfryngau Creadigol – Cynhyrchu Gemau	Coleg Menai, Llangefni
BTEC Lefel 3	Peirianeg Fecanyddol	Coleg Menai, Llangefni
BTEC Lefel 3	Peirianeg Sifil ac Adeiladwaith	Coleg Menai, Llangefni

Gweler manylion y pynciau unigol gyda disgrifiadau'r pynciau eraill. Bydd dim ond lle i nifer cyfyngedig o fyfyrwyr ar y cyrsiau a restrir.

Bydd y dysgu yn digwydd mewn sesiynau bore a /neu brynhawn. Yn ogystal â'r cyfnod hwn bydd disgwyl i'r myfyrwyr wneud ychydig o waith yn yr ysgol. Gwneir trefniadau i gludo'r myfyrwyr o'r ysgol i'r lleoliad addysgu ac yn ôl i'r ysgol, a phan fydd gwersi yn parhau yn hwyrach na 3.20pm bydd rhaid i'r myfyrwyr wneud eu trefniadau eu hunain i gyrraedd adre.



## ADDYSG A CHYFARWYDDYD GYRFAOEDD

Mae Addysg a Chyfarwyddyd Gyrfaoedd yn broses barhaol yn natblygiad gyrfaoel pob myfyriwr/wraig ac mae'n bwysig i chi gadw mewn cysylltiad agos â'r adran gydol y ddwy flynedd.

Ceir gwybodaeth am holl gyrsiau Colegau Addysg Uwch, a Phrifysgolion ym mhrosbectws y sefydliadau sydd ar gael yn y Ganolfan Yrfaoedd yn ystafell 115. Yn ogystal mae gwybodaeth ar gael am hyfforddiant, Prentisiaethau a manylion am swyddi yn lleol a chenedlaethol. Mae cynghorydd gyrfaoedd Cwmni Gyrfa Cymru ar gael i gyfweled â myfyrwyr Blwyddyn 12 a 13 yn ôl y galw.

Mae pwyslais arbennig ar gynghori unigol a chynigir cymorth, cyngor a gwybodaeth yrfaol i bawb ym Mlwyddyn 12 a 13. Gellir defnyddio'r ystafell yrfaedd, 115, ar unrhyw adeg.

## PWYNTIAU UCAS

Mae'r Llywodraeth wedi diwygio'r system bwyntiau ar gyfer mynediad i Brifysgol. Ers Medi 2016 mae'r graddau A\* → E werth y pwyntiau a ddangosir yn y tabl isod.

SAFON UWCH/UG A CYMHWYSOL UWCH GCE A/AS and ADVANCED APPLIED				
UWCH GYFRANNOL  AS LEVEL	LEFEL A A'R BAC  A LEVEL AND BACC	TARIFF NEWYDD  NEW TARIFF POINTS	BTEC DIPLOMA ATODOL SUBSIDIARY DIPLOMA	BTEC TYSTYSGRIF CERTIFICATE
	A*	56	D*	
	A	48	D	
	B	40		
	C	32	M	
		28		D*
	D	24		D
A		20		
B	E	16	P	M
C		12		
D		10		
		8		P
E		6		



## CYFOETHOGI

### CYFLEOEDD AMRYWIOL

Rydym yn cynnig pob math o gyfleoedd i'n myfyrwyr. Yn y blynyddoedd diweddar rydym wedi cymryd rhan mewn amrywiaeth o brosiectau ac wedi cael ymweliadau gan nifer eang o siaradwyr gwadd ac rydym yn annog pob myfyriwr i fanteisio yn llawn ar yr arlwy.

Cyngor Ysgol  
Pwyllgor y 6ed  
Mentora disgyblion iau  
Mentoriaid mathemateg  
Prif swyddogion  
Swyddogion  
Swyddogion Chwaraeon



Siarad Cyhoeddus - CEWC a'r CU  
Cystadlaethau Crest / EESW  
Prosiect Nuffield  
Cyrsiau Headstart



Ysgolion Haf Sutton Trust  
Ysgolion Haf UNIQ  
Ysgol Haf Prifysgol Bangor  
Ysgol Haf Prifysgol Aberystwyth  
Ysgolion Haf dramor e.e. Harvard, Yale  
Ysgolion Haf Rhydychen a Chaergrawnt  
Cynllun Seren  
Confensiwn UCAS, Lerpwl

Bwrsariaethau Cwmni Lifrau Cymru  
Gwobr Dug Caeredin  
Cynllun Doctoriaid Yfory  
Cynllun Speakers for Schools



Gwaith elusenol  
Cyfweiliadau Rotary  
Gwobr Arweinwyr Rotary  
Prosiect Profi, Prifysgol  
Bangor  
Teithiau addysgol



## PROFIAD GWAITH

Treulia myfyrwyr Blwyddyn 12 bum niwrnod yn cael profiad gwaith, yn ystod mis Gorffennaf. Ni ddylai'r myfyrwyr ail-adrodd y profiad gwaith a gawsant ym Mlwyddyn 10, oni bai fod rheswm dilys dros wneud hynny. Dylai'r myfyrwyr ymgynghori â'u hathrawon pwnc a'u tiwtoriaid wrth geisio penderfynu ar faes profiad ond mae pob disgybl yn gyfrifol am drefnu ei brofiad gwaith ei hun. Dylid penderfynu ar faes profiad ar sail un o'r ffactorau a restrir isod:-

- I ddatblygu 'sgiliau craidd' ee cyfathrebu, datrys problemau, defnydd o hamdden.
- Am fod â wnelo a dewis gyrfa.
- Er mwyn i'r profiad alluogi disgybl i gwblhau prosiect/gwaith cwrs.

## GWAITH GWIRFODDOL / MAGU PROFIAD PERTHNASOL

Mae'r ysgol yn awyddus i ryddhau myfyrwyr Blwyddyn 12 ac 13 ar leoliad i wneud gwaith gwirfoddol neu i fagu profiad perthnasol ar gyfer eu dyfodol. Yn naturiol bydd hyn yn digwydd pan nad oes gwersi o fewn un cyfnod ysgol, e.e. un bore/prynhawn yr wythnos. Mae prifysgolion yn chwilio am fyfyrwyr sydd yn fodlon cynnig mwy na'r cyffredin.

## ADNODDAU

### CANOLFAN Y 6ED A'R HARBWR

Disgwylir i bawb fanteisio ar y cyfle a gwneud gwir ddefnydd o Ganolfan y 6ed, yr Ystafell Dawel a'r Harbwr. Mewn gwersi disgyswllt disgwylir i fyfyrwyr edrych dros eu nodiadau gwersi, creu eu nodiadau eu hunain, a dysgu ac adolygu gwaith. Bydd rhaid i chi weithio'n annibynnol yn y Brifysgol, felly dechreuwch yn awr!



Mae rheolau pendant ynglŷn â sut i ddefnyddio'r Ystafell Dawel a'r Harbwr. Distawrwydd yw'r rheol euraidd. Pwysleisir bod yn rhaid cadw at y rheol hon bob amser er chwarae teg i bawb.

Anelwn at eich cynorthwyo chi i addasu'n naturiol i fywyd myfyriwr call a'ch cymell i fod yn hunan ddisgybledig - rhywbeth sy'n anodd ond sy'n hollbwysig er mwyn llwyddo.



### TECHNOLEG GWYBODAETH A CHYFATHREBU

Mae'r ysgol wedi buddsoddi'n helaeth i ehangu ei rhwydwaith cyfrifiadurol er mwyn darparu mynediad cyflym i'r Rhyngwyd drwy'r ysgol. Mae cyfrifiaduron ar gael ar gyfer Blwyddyn 12/13 yng Nghanolfan y Chweched ac yn yr Harbwr, yn ogystal â nifer o liniaduron y gall myfyrwyr eu benthyg, neu gall unigolion ddod â'u gliniaduron eu hunain i'r ysgol. Mae loceri ar gael i'w cadw.



## LLES



Anogir myfyrwyr i siarad gydag unrhyw aelod o Dîm y 6ed os ydynt yn pryderu o gwbl am unrhyw agwedd o'u hiechyd neu eu gwaith. Mae croeso i rieni gysylltu hefyd er mwyn i ni sicrhau eu bod yn rhoi y gefnogaeth orau i'r myfyrwyr.

### LWFANS CYNHALIAETH ADDYSG

Os ydych yn parhau mewn addysg ar ôl i chi gyrraedd yr oedran gadael ysgol statudol [16] gallech fod yn gymwys i wneud cais am LCA. Gallwch dderbyn hyd at £60 i'ch cyfrif banc bob pythefnos i'ch helpu gyda'r gost o barhau a'ch addysg.

Mae manylion pellach yn y pecyn cais LCA Cymru ar gael yn yr ysgol neu ar y wefan <https://www.cyllidmyfyrwycymru.co.uk/ab/lca.aspx>

## RHEOLAU

Bydd rheolau cyffredinol yr ysgol yn berthnasol i fyfyrwyr ôl 16, ond gobeithir mai hunan ddisgyblaeth fydd yn rheoli eich ymddygiad.

### BREINTIAU

1. **CANOLFAN BL12/13** - Dyma ystafell waith anffurfiol gyda mynediad i gyfrifiaduron, gan gynnwys mynediad i'r we trwy'r polisi Defnyddio Dyfeisiau Personol. Disgwylir i chi barchu'r adeilad a'r eiddo.
2. **COFRESTRU** - Rhaid i bob disgybl gofrestru yn brydlon am 8.50 am ac am 1.35 pm os nad oes gennych wers.
3. **GADAEL YR YSGOL YN YSTOD Y DYDD** - Caniateir i fyfyrwyr Blwyddyn 12 sydd â bore neu brynhawn cyfan heb wersi i aros adref i weithio am un sesiwn yn unig yr wythnos OS YDY'CH RHIENI YN CYTUNO Â HYN - gweler copi o'r cytundeb swyddogol a gytunwyd gan lywodraethwyr yr ysgol.

### GWISG YSGOL

Disgwylir i bob aelod Blwyddyn 12+13 i fod yn esiampl i ddisgyblion iau yn eu gwisg. Mae'r wisg ysgol a gytunwyd gan y Llywodraethwyr yn orfodol i holl fyfyrwyr Blwyddyn 12 a 13.

Disgwylir i'r myfyrwyr wisgo trowsus neu sgert **blaen** du (at y pen-glin), crys gwyn gyda siwmpwr gwddw v ddu gyda logo Blwyddyn 12/13 Ysgol David Hughes a thei swyddogol Ysgol David Hughes. Rydym yn gofyn i fyfyrwyr wisgo **esgidiau du unlliw**. Bydd angen cot ysgol dywyll yn ystod tywydd oer/gwlyb.



## Y DYFODOL

### GWYBODAETH A CHYNGOR YNGLŶN Â MYNEDIAD I ADDYSG UWCH

Nod Blynnyddoedd 12 a 13 yw eich paratoi ar gyfer eich cam nesaf i'r dyfodol. Chi yn unig all wneud y penderfyniadau pwysig sydd o'ch blaen ond mae pob aelod o dîm personél y 6ed yn awyddus iawn i'ch cynghori a'ch cynorthwyo bob amser. **Os oes, angen help arnoch gofynnwch!**

Mae gennym ddwy system gynghori sy'n bodoli ar y cyd - un ffurfiol ac un anffurfiol.

#### FFURFIOL

1. **Llawlyfr** - Gwybodaeth am bopeth yn ymwneud â Blwyddyn 12 + 13.
2. **Diwrnod Cyflwyno Blwyddyn 12** - Cyfle i ymgyswngtu â'r drefn, cyfarfod tiwtoriaid personol, derbyn amserlen, trafod cyrsiau ayyb.
3. **Diwrnod Cyngor Ar Fynediad i Addysg Uwch/Addysg Prifysgol** - Cyfarwyddyd ar lenwi ffurflenni, llawlyfr i gynnig cymorth ychwanegol, cyngor gan arbenigwyr.
4. **Nosweithiau Rhieni** - Gwahoddiad i rieni glywed y cyngor uchod.
5. **Trosglwyddo i Addysg Uwch** - Cedwir cofnod o ofynion colegau ar gyfer y gwahanol gyrsiau, y cynigion a gawsom, a'ch dewisiadau pendant ac amodol.
6. **Diwrnod Canlyniadau** - Mawr obeithiwn y cewch y canlyniadau yr hoffech - ond beth bynnag a ddigwydd, bydd cyngor a chymorth ar gael.

#### ANFFURFIOL

Mae gan bob myfyriwr DIWTOR PERSONOL. Bydd y tiwtor ar gael i drafod problemau a rhoi cyngor.

#### CYNGOR GYRFAOL

Gellir gwneud apwyntiad i siarad â'r athrawon gyrfaoedd.

## Y CAM NESAF

- Noson Agored - cyfle i drafod gyda myfyrwyr ac athrawon
- Dewis pynciau
- Llenwi ffurflen bynciau
- Llenwi ffurflen gais
- Cadarnhau eich lle ar ddiwrnod y canlyniadau

**Mawr obeithiwn y mwynhewch eich gyrfa ôl 16 a dymunwn bob llwyddiant a bendith i chi ar ddechrau'ch taith i'r dyfodol.**





**Blas ar  
fywyd yn  
y 6ed**





# Ysgol David Hughes



@DavidHughes6ed

Ffordd Pentraeth,  
Porthaethwy,  
Ynys Môn,  
LL59 5SS

Ffôn: 01248 712287

E-bost: [post@ysgoldavidhughes.org](mailto:post@ysgoldavidhughes.org)

